

Diputado Nel Oduber a declara

AGENTENAN POLICIAL NO POR ANULA TRASLADO

ORANJESTAD(AAN)—

Den un comunicado, emiti pa Diputado Nel Oduber, encarga cu Estructura Estatal, ta wordo muestra claramente cu e agentenan policial cu a pidi traslado y a haya esaki, no por entrega awor un peticion pa anula e decision.

Diputado Oduber a muestra cu relaciona cu publicacionnan den medionan di publicidad, cu no ta contribui na un bon desarrollo encuanto nos futuro cuerpo policial, e ta sinti su mes obliga, di duna pueblo un splicacion exacto con e asuntonan ta marchando.

E diputado a bisa cu ta lastima cu esnan cu kier trece tension den e cuerpo no ta identifica nan mes, pero ta sconde bao di e pretexto di informante clave. El a bisa cu na Aruba ultimo tempo a bira costumbre cu via panfleta cu no ta firma, pero si ariba papel di un sindicato, ta duna informenan incorrecto.

Segun Diputado Oduber Gobierno di Aruba ta cumpliendo cabalmente cu e obligacionnan cu e tin pa su futuro cuerpo policial. Dia 13 di Mei 1985, Gobierno di Aruba hunto cu Gobierno Central y sindicato di polis a reuni y a yega na diferente convenionan cu ta sagrado. Ta un hecho conocido, segun e diputado, cu Ministro di Justicia a dicidi na Februari pa honra 21 peticion pa traslado pa otro isla. E nombrenan aki a sali den varios corant y ta esnan cu a expresa mediante sindicato cu ni si Aruba ofrece nan oro o diamante nan lo kier siribi e pueblo aki despues di 1986.

Gobierno di Aruba a manda un carta pa e Ministro di Justicia, pidiendo pa e asunto di traslado bay na un forma ordena y pa tene cuenta cu e interes Arubano.

A conveni dia 13 di Mei 1985 cu lo no papia mas di 21 agentenan policial cu a

haya traslado.

Gobierno di Aruba a expresa di tin lugar pa e 21 agentenan y a expresa duele di mira nan bay, pero si esey ta nan deseo e ta wordo respeta, expresando palabra di gradecimento pa e tempo cu nan a sirbi e Pueblo Arubano.

Diputado Oduber ta bisa cu mirando cu nos kier claridad, a pidi Ministro di Justicia pa e traslacionnan aki tuma lugar pronto. Guia pa e trabaoonan di Gobierno tabata dos rapport cu a bini cla na Maart 1985 y cu ta trata e futuro vision ariba e cuerpo policial Arubano y e otro cu ta trata e aspectonan personal di e polis.

A yega na un acuerdo cu e sindicato di polis ariba condicionnan bao di cual un agente policial por wordo poni na disposicion di Aruba a base di e agente cu Aruba tin mester.

Dia 6 di Juni 1985 a bay cartanan di tanto Gobierno Central como Insular pa tur polis na Aruba. E cartanan tabata contene vision Arubano ariba e futuro organizacion policial Arubano, condicionnan bao di cual por wordo poni na disposicion pa e Cuerpo Arubano y posibilidadnan dentro di e Cuerpo Arubano.

Segun e rapport di e comision mixto, mester nombra un asina yama "toetsingcommissie" cu segun criterionan di afiliacion cu un isla y otro razonnan bon argumenta un polis por bini na remarke pa traslado.

Dia 17 di Juni e comision a wordo nombra y tur hende a bay di acuerdo cu e procedura cu a wordo palabra, esta cu tur polis, excepcion di e 21 nan cu a haya traslado mester yena un peticion nobo.

Diputado Oduber ta muestra cu a keda palabra cu esnan cu e comision recomenda, por bay. Ademas Ministro lo participa

e sindicato di polis dia Promer di Juni 1985 y esnan cu nenga lo por bay Juez.

Ministro di Justicia den consulta cu Diputado Oduber, lo dicidi, y esaki a socede dia 29 di Juni 1985.

E comision a recomenda Gobierno pa nenga 72 peticion pa traslado y 42 cu a wordo mal yena o mihor bisa no a cumpli cu e exigencianan necesario. E comision a recomenda pa honra 25 peticion.

Dia 29 di Juni, Diputado Oduber y Ministro di Justicia a yega na un acuerdo cu 25 por a bay y cu e peticionnan lo wordo honra.

Dia Promer di Juli, Ministro di Justicia a participa na e sindicato di polis e 25 nombrenan, kende su peticion a wordo honra.

E Diputado a trece dilanti cu mester gradici e toetsingcommissie pa e forma diligente cu bao di circunstancianan dificil el a haci un bon trabao. E comision ta wordo forma pa personanan respeta den comunidad di Aruba y Antillas y nan ta pa Gobierno Central, Mr. Faroe Metry, experto fiscal, pa Gobierno di Aruba, sr. Elio Nicolaas, ex Inspector di Polis mientras cu sindicato di polis a apunta sr. John Booi, ex secretario di territorio insular.

Gobierno Central y Gobierno di Aruba dia Promer di Juli a firma un protocol cu bond di polis. E documento tabata contene 12 punto.

Diputado Nel Oduber ta sigui muestra cu pa medio di e proyect bureau a acerca Comisario Interino for di mas di dos siman pasa pa haya su cooperacion pa por cuminsa yena e structuradi e futuro cuerpo policial. A bolbe tende cu no por coopera ainda, pasobra formalmente no a tende di e Ministro tocante e 25 traslacionan.

E asunto a bolbe straña Diputado Oduber, pasobra e Ministro di Justicia dia Promer di Juli a lesa e 25 nombrenan di e agentenan cua haya traslado dilanti di alto Comisario Oldenboom kende ta jefe d e Comisario na Aruba.

Diputado Oduber a muestra cu Gobierno di Aruba mester bini cla cu e asunto aki y a manda un telegram pa e Ministro di Justicia dia 12 di Juli, pidiendo pa tuma e decision formalmente den consejo di Ministro.

A bay tambe un carta na e Ministro y tabata tin contacto telefonico. Segun Diputado Oduber por a comprende, Diavines dia 19 di Juli e decision definitivo lo a cay.

Diputado Oduber ta bisa cu el a dicidi di emiti e comunicado, pasobra e ta di opinion cu mester pone un fin na esnan cu no kier identifica nan mes y kier torpedea a todo costo un cuerpo policial Arubano. Un biaha mas el a trece bon cla dilanti cu e 21 agentenan por bay na momento cu e Ministro yena fecha. Promer cu e haci esaki mester tene cuenta cu interes general di Antillas y tambe di Aruba. E 25 agentenan encuanto kende e toetsingcommissie a conseja positivamente pa honra nan peticionnan, manera ambos Gobierno a haci, tambe lo bay.

Ta keda na e Gobierno autentico di Aruba pa despues di yena e cuerpo pa 1986, mira cual ta e vacaturanan cu a keda y e ora lo bay pidi Gobierno Central pa mira ta cual ta e agentenan cu lo bay pidi pa keda na disposicion di e Cuerpo di Aruba.

E Jefe di Polis pa Aruba lo wordo nombra pronto, segun Diputado Oduber, kende a muestra cu Gobierno Insular ta evaluando con por sirbi e pueblo y e cuerpo mejor cu un decision mas responsable cu ta posible.



Diputado Oduber a termina bisando cu e ta sera cu asina a pone un fin na tur esnan cu kier sigui sembra descordia den e cuerpo, dunando henter pueblo y especialmente polis, e informe real y firme.

Tambe ta pone un fin na e mal rumornan e ta di opinion cu e ta sirbi e pueblo, e sindicato di polis y tur agente individual mihor.

"Esun cu coba buraco pa otro cay aden, den bida ta e mes ta cay aden" Diputado Oduber a bisa.

El a muestra cu si esey socede poco hende cu nan intencion no tabata pa bay o a hacie a base di solidaridad o awor kier anula nan peticion ta convenci cu no por. Esun cu no ta contento, segun e diputado, o cu kier haci wega, por bay Juez y ta haci bon pa hiba tur documento y notanan di tur reunion hunto cune pa asina e juez por juzga mihor.

"E asunto aki ta mucho serio pa permiti algun hende sigui haci wega cu futuro y tranquilidad di nos Pueblo, Diputado Oduber a termina bisando.

REGINA

595,=

UNICON

Fergusonstraat

Antillian Mercantile Corp.

O'stad - San Nic.